

ÁKVÖRDUN nr. E5

2020/EES/69/19

frá 16. mars 2017

um hagnýtt fyrirkomulag vegna umbreytingartímabils varðandi upplýsingaskipti með rafrænum aðferðum sem um getur í 4. gr. reglugerðar (EB) nr. 987/2009*(Texti sem varðar EES og samning EB og Sviss)*

2017/C 233/03 (*)

FRAMKVÆMDARÁÐIÐ UM SAMRÆMINGU ALMANNATRYGGINGAKERFA HEFUR,

með hliðsjón af a-lið 72. gr. reglugerðar Evrópuþingsins og ráðsins (EB) nr. 883/2004 frá 29. apríl 2004 um samræmingu almannatryggingakerfa ⁽¹⁾, en samkvæmt honum skal framkvæmdaráðið fjalla um álitafni er lúta að framkvæmd og túlkun ákvæða reglugerðar (EB) nr. 883/2004 og reglugerðar Evrópuþingsins og ráðsins (EB) nr. 987/2009 frá 16. september 2009 sem kveður á um framkvæmd reglugerðar (EB) nr. 883/2004 um samræmingu almannatryggingakerfa ⁽²⁾,

með hliðsjón af d-lið 72. gr. reglugerðar (EB) nr. 833/2004 um samræmingu almannatryggingakerfa, en samkvæmt honum skal framkvæmdaráðið hvetja eins og hægt er til notkunar nýrrar tækni,

með hliðsjón af 4. gr. reglugerðar (EB) nr. 987/2009 þar sem fram kemur að „Sending upplýsinga milli stofnana eða samskiptastofnana skal vera með rafrænum hætti ...“ og „Framkvæmdaráðið skal mæla fyrir um skipulag, innihald, framsetningu og nákvæmt fyrirkomulag vegna skipta á skjölum og skipulega uppsettum rafrænum skjölum“,

með hliðsjón af 95. gr. reglugerðar (EB) nr. 987/2009 um aðlögunartímabilið þar sem fram kemur að „Sérhvert aðildarríki getur nýtt sér aðlögunartímabil vegna rafrænnar miðlunar upplýsinga ...“ og að „Þessi aðlögunartímabil skulu ekki vera lengri en 24 mánuðir frá gildistökudegi framkvæmdarreglugerðarinnar.“,

og að teknu tilliti til eftirfarandi:

- 1) Ákvæði 95. gr. reglugerðar (EB) nr. 987/2009 heimilar framkvæmdaráðinu að mæla fyrir um hagnýtt fyrirkomulag vegna nauðsynlegra umbreytingartímabila [áður aðlögunartímabila] í því skyni að tryggja nauðsynleg upplýsingaskipti við beitingu grunnreglugerðarinnar og framkvæmdarreglugerðarinnar.
- 2) Nauðsynlegt er að útskýra þær grundvallarreglur sem stofnanir eiga að beita á meðan á umbreytingartímabilinu stendur.
- 3) Eftir gildistökudag nýju reglugerðanna var umtalsverður fjöldi umsókna í vinnslu, þar sem áunninn réttur myndaðist samkvæmt reglugerð (EBE) nr. 1408/71 ⁽³⁾, og í tengslum við þessar umsóknir grundvallast upplýsingaskipti almennt á málsmeðferðinni sem sett er fram í reglugerð (EBE) nr. 1408/71 og reglugerð (EBE) nr. 574/72 ⁽⁴⁾, þ.m.t. notkun E-eyðublaða.
- 4) Ákvæði 1. mgr. 94. gr. reglugerðar (EB) nr. 987/2009 felur í sér að við þær aðstæður, sem fram koma í fyrri forsendu, séu veittar „tvöfaldar bætur“ og að bótaþegi fái hærri greiðsluna.
- 5) Í langflestum eða öllum tilvikum hækkar greiðsla, sem grundvallast á fyrri reglugerðum, þó ekki við beitingu nýju reglugerðanna. Í samræmi við það er talið óraunhæft að búast við að stofnanir beiti tvöfaldri málsmeðferð bæði samkvæmt reglugerð (EBE) nr. 574/72 og reglugerð (EB) nr. 987/2009 við þessar aðstæður.

(*) Þessi ESB-gerð birtist í Stjtið. ESB C 233, 19.7.2017, bls. 3. Hennar var getið í ákvörðun sameiginlegu EES-nefndarinnar nr. 162/2019 frá 13. júní 2019 um breytingu á VI. viðauka (Félagslegt öryggi) við EES-samninginn (bíður birtingar).

⁽¹⁾ Stjtið. ESB L 166, 30.4.2004, bls. 1.

⁽²⁾ Stjtið. ESB L 284, 30.10.2009, bls. 1.

⁽³⁾ Reglugerð ráðsins (EBE) nr. 1408/71 frá 14. júní 1971 um beitingu almannatryggingareglna gagnvart launþegum og fjölskyldum þeirra sem flytjast milli aðildarríkja (Stjtið. EB L 149, 5.7.1971, bls. 2).

⁽⁴⁾ Reglugerð ráðsins (EBE) nr. 574/72 frá 21. mars 1972 sem kveður á um framkvæmd reglugerðar (EBE) nr. 1408/71 um beitingu almannatryggingareglna gagnvart launþegum og fjölskyldum þeirra sem flytjast milli aðildarríkja (Stjtið. EB L 74, 27.3.1972, bls. 1).

- 6) Ákvæði 5. mgr. ákvörðunar nr. H1 skýrir stöðu vottorða (E-eyðublaða) og evrópska sjúkratryggingakortsins (þ.m.t. bráðabirgðavottorðanna) sem eru gefin út fyrir gildistökudag reglugerðar (EB) nr. 883/2004 og reglugerðar (EB) nr. 987/2009.
- 7) Innan umbreytingartímabilsins er aðildarríkjum fjárlast að ákveða hvenær þau eru reiðubúin til að taka þátt í rafrænni miðlun upplýsinga um almannatryggingar (EESSI) að öllu leyti eða vegna valinna málatilvika (BUC) en skulu leitast á sama tíma við að fylgja fyrirhugaðri innleiðingu rafrænnar miðlunar upplýsinga um almannatryggingar innan aðildarríkjanna og runum málatilvika til að hefja rafræna miðlun eins og framkvæmdaráðið mælir með.

Í samræmi við skilyrðin sem mælt er fyrir um í 2. mgr. 71. gr. reglugerðar (EB) nr. 883/2004.

ÁKVEÐIÐ EFTIRFARANDI:

1. Á umbreytingartímabilinu skal leiðbeinandi meginregla vera gott samstarf milli stofnana, gagnsemi og sveigjanleiki. Það sem mestu skiptir er þörfin á að tryggja snurðulaus umskipti fyrir borgarana þegar þeir nýta sér rétt sinn samkvæmt nýju reglugerðunum.
2. Frá og með gildistökudegi reglugerðar (EB) nr. 883/2004 og reglugerðar (EB) nr. 987/2009 munu pappírsgáfur af skipulega uppsettum rafrænum skjölum (SED) koma í stað þeirra E-eyðublaða sem byggjast á reglugerðum (EBE) nr. 1408/71 og (EBE) nr. 574/72.
3. Þrátt fyrir 2. mgr. geta aðildarríki, sem hafa eigin rafeindabúnað til að útbúa E-eyðublöð eða stunda rafræn gagnaskipti (t.d. Build-verkefnið) sem, ef allrar sanngirni er gætt, ekki er hægt að breyta innan þessara tímamarka, haldið áfram að nota þau á umbreytingartímabilinu, svo fremi réttur borgaranna samkvæmt nýju reglugerðunum sé að fullu tryggður.
4. Í öllum tilvikum, á meðan umbreytingartímabilið varir, skal stofnun samþykkja viðkomandi upplýsingar á hvaða skjali sem er sem gefið er út af annarri stofnun, jafnvel þó að form skjalsins, innihald eða efnisskipan sé úrelt. Komi upp vafi um réttindi hlutaðeigandi borgara skal stofnunin hafa samband við útgáfustofnunina í anda góðrar samvinnu.
5. Eins og fram kemur í 5. mgr. ákvörðunar nr. H1 skulu E-eyðublöð, skjöl og evrópsk sjúkratryggingakort (þ.m.t. bráðabirgðavottorðin), sem gefin eru út fyrir gildistökudag reglugerðar (EB) nr. 883/2004 og reglugerðar (EB) nr. 987/2009, gilda áfram og skulu yfirvöld annarra aðildarríkjanna taka þau til greina jafnvel eftir þann dag, þar til gildistími þeirra rennur út eða þar til þau eru afturkölluð eða þeim skipt út fyrir önnur skjöl sem gefin eru út eða tilkynnt samkvæmt reglugerð (EB) nr. 883/2004 og reglugerð (EB) nr. 987/2009.
6. Sérhverju aðildarríki er heimilt að fylgja sveigjanlegri áfangaskiptri nálgun við að koma á rafrænni miðlun upplýsinga um almannatryggingar (EESSI) eftir því sem það verður reiðubúið til að nota rafræna miðlun upplýsinga um almannatryggingar í gegnum einn eða fleiri aðgangspunkta.
7. Í samstarfssamningi innan framkvæmdaráðsins verður skilgreind sú fyrirhugaða runa málatilvika (BUC) í rafrænni miðlun upplýsinga um almannatryggingar sem aðildarríki eiga að fylgja, sbr. þó 6. mgr. Þessi röð verður byggð á stigvaxandi fjölgun málatilvika (BUC) og mun fela í sér samþættingu málatilvika þegar það á við.
8. Í hverju málatilviki (BUC) þar sem rafræn gagnaskipti hafa hafist skal hvert aðildarríki leitast við að taka hefja þátttöku svo fljótt sem auðið er þegar tæknileg samþætting þess gerir það kleift.
9. Aðildarríkin munu annast gagnaskipti bæði á pappírsmáli og rafrænu formi í sama málatilviki (BUC) þar til öll aðildarríkin eru reiðubúin til að nota rafræna miðlun upplýsinga um almannatryggingar í þessu tiltekna málatilviki.
10. Að vera reiðubúinn til að nota rafræna miðlun upplýsinga um almannatryggingar (e. „EESSI-enabled“) í tilteknu málatilviki (BUC) merkir að hlutaðeigandi aðildarríki getur bæði sent og tekið á móti öllum tilkynningum í því því málatilviki til og frá öðrum aðildarríkjum.

11. Upplýsingarnar um hvaða málatilvik (BUC) í hvaða aðildarríki er tilbúið fyrir rafræna miðlun upplýsinga um almannatryggingar skulu liggja í skrá sem er aðgengileg stofnunum í aðildarríkjunum og einnig endurspeglast í stofnanaskrá fyrir rafræna miðlun upplýsinga um almannatryggingar. Aðildarríkin skulu upplýsa framkvæmdaráðið skriflega með hæfilegum fyrirvara áður en þau verða reiðubúin til að nota rafræna miðlun upplýsinga um almannatryggingar í tilteknu málatilviki (BUC).
12. Á umbreytingartímabilinu skulu upplýsingaskipti milli tveggja aðildarríkja vegna málatilviks (BUC) annaðhvort vera með rafrænni miðlun upplýsinga um almannatryggingar eða án slíkrar miðlunar í öllum gagnaskiptum sem falla undir viðkomandi málatilvik (BUC), með fyrirvara um tvíhliða ráðstafanir sem geta t.d. varðað sameiginlegar prófanir eða þjálfun eða sambærilegar ástæður, og skulu aðeins fara fram með rafrænni miðlun upplýsinga um almannatryggingar frá þeirri stundu þegar bæði hafa lýst því yfir að vera reiðubúin til að nota slíka miðlun í viðkomandi málatilviki (BUC).
13. Ef um er að ræða marghliða málatilvik (BUC), þ.e. tilvik þar sem fleiri en tvö aðildarríki taka þátt í gagnaskiptunum, skulu gagnaskipti með rafrænni miðlun upplýsinga um almannatryggingar ekki hefjast fyrr en staðfest hefur verið að aðeins aðildarríki, sem hafa lýst því yfir að vera reiðubúin til að nota rafræna miðlun upplýsinga um almannatryggingar í þessu tiltekna málatilviki, taki þátt í þeim gagnaskiptum. Meginreglurnar sem tilgreindar eru í 12. mgr. gilda einnig í tilvikum þar sem fleiri en tvö aðildarríki taka þátt í málatilviki (BUC).
14. Ákvörðun þessi skal birt í *Stjórnartíðindum Evrópusambandsins*. Hún skal koma til framkvæmda frá og með tuttugasta degi eftir birtingu hennar.
15. Ákvörðun þessi kemur í stað ákvörðunar nr. E1 frá 12. júní 2009.

Formaður framkvæmdaráðsins,

Malcolm SCICLUNA
